

সেঁজুতি

সেঁজুতি

রবীন্দ্রনাথ ঠাকুর

K. L. M. (ed)
1910

বিশ্বভারতী গ্রন্থন-বিভাগ

২১০ কৰ্মওয়ালিস স্ট্রীট, কলিকাতা


প্রকাশক—শ্রীকিশোরীমোহন সঁাতরা।

সৈঁজুতি

SHELF LISTED

প্রথম সংস্করণ

ভাদ্র, ১৩৪৫ সাল।



মূল্য—দুই টাকা।

শান্তিনিকেতন প্রেস, শান্তিনিকেতন, (বীরভূম)।

প্রভাতকুমার মুখোপাধ্যায় কর্তৃক মুদ্রিত।

উৎসর্গ

ডাক্তার সার নীলরতন সরকার

বন্ধুবরেন্দ্র—

অন্ধ তামস গহ্বর হতে

ফিরিহু সূর্যালোকে ।

বিস্মিত হয়ে আপনার পানে

হেরিহু নূতন চোখে ।

মর্ত্যের প্রাণ-রঙ্গভূমিতে

যে-চেতনা সারারাত্তি

সুখ দুঃখের নাট্যলীলায়

যে লে রেখেছিল বাতি

সে আজি কুকাথায় নিয়ে যেতে চায়

অঁচিহ্নিতের পারে,

নব-প্রভাতের উদয়সীমায়

অরুপলোকের দ্বারে ।

আলো আঁধারের ফাঁকে দেখা যায়

অজানা তীরের বাসা,

ঝিমঝিম করে শিরায় শিরায়

দূর নীলিমার ভাষা ॥

সেঁ ভাবার আমি চরম অর্থ
জানি কিবা নাহি জানি,—
ছন্দের ডালি সাজাহু তা দিয়ে,
তোমাতে দিলাম আনি' ।

রবীন্দ্রনাথ ঠাকুর

শান্তিনিকেতন

১ জ্যৈষ্ঠ, ১৩৪৫

সূচী

জন্মদিন	আজ মম জন্মদিন	১
পত্রোত্তর	চির প্রেমের বেদী-সম্মুখে	৮
ষাবার মুখে	যাক এ জীবন	১২
অমর্ত্য	আমার মনে একটুও নেই বৈকুণ্ঠের আশা	১৬
পলায়ন	যে পলায়নের অসীম তরঙ্গী	১৮
স্মরণ	যখন রবো না আমি মর্ত্যকায়	২২
সন্ধ্যা	চলেছিল সারা প্রহর	২৫
ভাগীরথী	পূর্বযুগে, ভাগীরথী, তোমার চরণে দিল আনি	২৮
তীর্থযাত্রিণী	তীর্থের যাত্রিণী ও যে	৩১
নতুন কাল	কোন দৈব কালের কণ্ঠ হতে এসেছে এই স্বর	৩৪
চলতি ছবি	রোদ্দুপ্তে ঝাপসা দেখায়	৩৮
ঘর ছাড়া	তখন একটা রাত	৪২
জন্মদিন	দৃষ্টিজালে জড়ায় ওকে হাজারখানা চোখ	৪৬
প্রাণের দান	অব্যক্তেব অন্তঃপুরে উঠেছিলে জেগে	৪৯
নিঃশেষ	শরৎ বেলার বিস্তৃতিহীন মেঘ	৫০
প্রতীক্ষা	অসীম আকাশে মল্লতপস্বী	৫১
পরিচয়	একদিন তরীখানা থেমেছিল	৫৩
পালের নৌকা	তীরের পানে চেয়ে থাকি	৫৬

চলাচল	ওরা তো সব পথের মানুষ	৫৮
মায়া	করেছিল যত স্বপ্নের সাধন	৫৯
গগনেন্দ্রনাথ ঠাকুর	রেখার রঙের তীর হতে তীরে	৬১
ছুটি	আমার ছুটি আসছে কাছে	৬২



সেঁজুতি

জন্মদিন

আজ মম জন্মদিন । সত্যই প্রাণের প্রাস্তপথে
ডুব দিয়ে উঠছে সে বিলুপ্তির অঙ্ককার হতে
মরণের ছাড়পত্র নিয়ে । মনে হতেছে কী জানি
পুরাতন বৎসরে গ্রন্থিরাঁধা জীর্ণ মালাখানি
সেথা গেছে হিম হার ; নবশূত্রে পড়ে আজি গাঁথা
নব জন্মদিন । জন্মোৎসবে এই যে আসন পাতা
হেথা আমি যাত্রী শুধু, অপেক্ষা করিব, লব টিকা
মৃত্যুর দক্ষিণ হস্ত হতে নূতন অরুণলিখা
যবে দিবে যাত্রার ইঙ্গিত ।

সেঁজুতি

আজ আসিয়াছে কাছে
জন্মদিন মৃত্যুদিন, একাসনে দৌহে বসিয়াছে,
তুই আলো মুখোমুখি মিলিছে জীবনপ্রাস্তে মম
রজনীর চল্লি আর প্রত্যাশের শুকতারাসম,
এক মস্ত্রে দৌহে অভ্যর্থনা ।

প্রাচীন অতীত, তুমি
নামাও তোমার অর্ঘ্য ; অরূপ প্রাপের জন্মভূমি
উদয়শিখরে তার দেখো আদি জ্যোতি । করো মোরে
আশীর্বাদ, মিলাইয়া যাক তৃষাতপ্ত দিগন্তরে
মায়াবিনী মরীচিকা । ভরেছিহু আসক্তির ডালি
কাঙালের মতো, অশুচি সঞ্চয়পাত্র করো খালি,
ভিক্ষামুষ্টি ধুলায় ফিরায়ে লও, যাত্রাতরী বেয়ে
পিছু ফিরে আর্ত চক্রে যেন নাহি দেখি চেয়ে-চেয়ে
জীবন-ভোজের শেষ উচ্ছিষ্টের পানে ।

বন্ধু

নিত্য নিত্য বুঝিয়ে দিতেছ মোরে ~~কি~~ তুফা যে কুধা
তোমার সংসার-রথে সহশ্রের সাথে বাঁধি' মোরে
টানায়েছে রাত্রি দিন স্থূল সূক্ষ্ম নানাবিধ ভোরে
নানা দিকে নানা পথে, আজ তার অর্থ গেল ক'মে
ছুটির গোধূলিবেলা তন্দ্রালু আলোকে । তাই ক্রমে

সেঁ জুতি

কিরায়ে নিতেছ শক্তি, হে কৃপণা, চক্ষুকর্ণ থেকে
আড়াল করিছ স্বচ্ছ আলো ; দিনে দিনে টানিছে কে
নিম্প্রভ নেপথ্য পানে । আমাতে তোমার প্রয়োজন
শিথিল হয়েছে, তাই মূল্য মোর করিছ হরণ,
দিতেছ ললাটপটে বর্জনের ছাপ । কিন্তু জানি
তোমার অবজ্ঞা মোরে পারে না ফেলিতে দূরে টানি' ।
তব প্রয়োজন হতে অতিরিক্ত যে মানুষ, তারে
দিতে হবে চরম সম্মান তব শেষ নমস্কারে ।
যদি মোরে পঙ্গু করো, যদি মোরে করো অন্ধপ্রায়,
যদি বা প্রচ্ছন্ন করো নিঃশক্তির প্রদোষছায়ায়,
বাঁধো বারধাকোর জালে, তবু ভাঙা মন্দিরবেদীতে
প্রতিমা অক্ষুণ্ণ র'বে সগৌরবে, তারে কেড়ে নিতে
শক্তি নাই তব ।

ভাঙো ভাঙো, উচ্চ করো ভগ্নস্তূপ,
জীর্ণতার অন্তরালে জানি মোর আনন্দস্বরূপ
রয়েছে উজ্জল হয়ে । সুধা তারে দিয়েছিল আনি'
প্রতিদিন চতুর্দিকে রসপূর্ণ আকাশের বাণী,
প্রভাস্তরে নানা ছন্দে গেয়েছে সে, ভালবাসিয়াছি ।
সেই ভালবাসা মোরে তুলেছে স্বর্গের কাছাকাছি

সেঁজুতি

ছাড়ায়ে তোমার অধিকার । আমার সে ভালবাসা
সব ক্ষয়ক্ষতিশেষে অবশিষ্ট র'বে ; তার ভাষা
হয়তো হারাবে দীপ্তি অভ্যাসের ম্লান স্পর্শ লেগে
তবু সে অমৃতরূপ সঙ্গে র'বে যদি উঠি জেগে
মৃত্যু-পরপারে । তারি অঙ্গে এঁকেছিল পত্রলিখা
আত্মমঞ্জরীর রেণু, এঁকেছে পেলব শেফালিকা
সুগন্ধি শিশির কণিকায় ; তারি সূক্ষ্ম উত্তরীতে
গেঁথেছিল শিল্পকারু প্রভাতের দোয়েলের গীতে
চকিত কাকলী সূত্রে ; প্রিয়ার বিহ্বল স্পর্শখানি
সৃষ্টি করিয়াছে তার সর্ব দেহে রোমাঙ্কিত বাণী,
নিত্য তাহা রয়েছে সঞ্চিত । যেথা তব কর্মশালা
সেথা বাতায়ন হতে কে জানি পরায়ে দিত মালা
আমার ললাট ঘেরি সহসা কণিক অবকাশে,
সে নহে ভূত্যের পুরস্কার ; কৌ ইঙ্গিতে কৌ আভাসে
মুহূর্তে জানায়ে চলে যেত অসীমের আত্মীয়তা
অধরা অদেখা দূত, ব'লে যেত ভাষাতীত কথা
অপ্রয়োজনের মানুষেরে ।

সে মানুষ, হে ধরণী,
তোমার আশ্রয় ছেড়ে যাবে যবে, নিয়ো তুমি গনি'

সেঁজুতি

যা কিছু দিয়েছ তারে, তোমার কর্মীর যত সাজ,
তোমার পথের যে পাথর, তাহে সে পাবে না লাজ ;
রিক্ততায় দৈন্ত্য নহে । তবু জেনো অবজ্ঞা করিনি
তোমার মাটির দান, আমি সে মাটির কাছে ঋণী—
জানায়েছি বারংবার, তাহারি বেড়ার প্রাস্ত হতে
অমৃতের পেয়েছি সন্ধান । যবে আলোতে আলোতে
লীন হোত জড় যবনিকা, পুষ্পে পুষ্পে তৃণে তৃণে
রূপে রসে সেই ক্ষণে যে গুঢ় রহস্য দিনে দিনে
হোত নিঃশ্বসিত, আজি মর্ত্যের অপর তীরে বৃষ্টি
চলিতে ফিরাহু মুখ তাহারি চরম অর্থ খুঁজি' ।

যবে শাস্ত নিরাসক্ত গিয়েছি তোমার নিমন্ত্রণে
তোমার অমরাবতী সুপ্রসন্ন গেই শুভক্ষণে
মুক্তদ্বার ; বুভুক্ষুর লালসারে করে সে বঞ্চিত ;
তাহার মাটির পাত্রে যে অমৃত রয়েছে সঞ্চিত
নহে তাহা দীন ভিক্ষু লালায়িত লোলূপের লাগি ।
ইন্দ্রের ঐশ্বর্য নিয়ে, হে ধরিত্রী, আছ তুমি জাগি
ত্যাগীরে প্রত্যাশা করি', নির্লোভেরে সঁপিতে সম্মান,
দুর্গমের পথিকেরে আতিথ্য করিতে তব দান
বৈরাগ্যের শুভ্র সিংহাসনে । ক্ষুধা যারা, লুপ্ত যারা,
মাংসগন্ধে মুগ্ধ যারা, একান্ত আত্মার দৃষ্টিহার

সেঁজুতি

শ্মশানের প্রাস্তর, আবর্জনাকুণ্ড তব ঘেরি'
বীভৎস চীৎকারে তা'রা রাত্রিদিন করে ফেরাফেরি,
নির্লজ্জ হিংসায় করে হানাহানি ।

শুনি তাই আজি

মানুষ জন্তর হুংকার দিকে দিকে উঠে বাজি' ।
তবু যেন হেসে যাই যেমন হেসেছি বারে বারে
পণ্ডিতের মূঢ়তায়, ধনীর দৈন্তের অত্যাচারে,
সজ্জিতের রূপের বিক্রমে । মানুষের দেবতারে
ব্যঙ্গ করে যে অপদেবতা বর্বর মুখবিকারে
তারে হাস্ত হেনে যাব, ব'লে যাব, এ প্রহসনের
মধ্য অঙ্কে অকস্মাৎ হবে লোপ ছুঁই স্বপনের,
নাট্যের কবররূপে বাকি শুধু র'বে ভস্মরাশি
দক্ষশেষ মশালের, আর অদৃষ্টের অটুহাসি ।
ব'লে যাব, দ্যুতচ্ছলে দানবের মূঢ় অপব্যয়
গ্রন্থিতে পারে না কভু ইতিবৃত্তে শাস্ত্রত অধ্যায় ।

বৃথা বাক্য থাক্ । তব দেহলিতে শুনি ঘণ্টা বাজে
শেষ প্রহরের ঘণ্টা ; সেই সঙ্গে ক্লান্ত বক্ষোমাঝে

সেঁজুতি

শুনি বিদায়ের দ্বার খুলিবার শব্দ সে অদূরে
ধ্বনিতেছে সূর্যাস্তের রঙে রাঙা পুরবীর সুরে ।
জীবনের স্মৃতিদীপে আজিও দিতেছে যারা জ্যোতি
সেই ক'টি বাতি দিয়ে রচিব তোমার সঙ্ক্যারতি
সপ্তর্ষির দৃষ্টির সম্মুখে, দিনান্তের শেষ পলে
র'বে মোর মৌন বীণা মূঁছিয়া তোমার পদতলে ।

আর র'বে পশ্চাতে আমার, নাগকেশরের চারা
ফুল যার ধরে নাই, আর র'বে খেয়াতরীহারা
এপারের ভালবাসা, বিরহস্মৃতির অভিমানে
ক্লান্ত হয়ে, রাত্রিশেষে ফিরিবে সে পশ্চাতের পানে ॥

গৌরীপুর ভবন, কালিম্পাং ।

২৫শে বৈশাখ, ১৩৪৫

সেঁজুতি

পত্রোত্তর

(ডাক্তার শ্রীসুরেন্দ্রনাথ দাসগুপ্তকে লিখিত)

বন্ধু,

চিরপ্রশ্নের বেদী-সম্মুখে চিরনির্বাক রহে
বিরটি নিরুত্তর,
তাহারি পরশ পায় যবে মন নম্র ললাটে বহে
আপন শ্রেষ্ঠ বর ।
খনে খনে তারি বহিরঙ্গণ-দ্বারে
পুলকে দাঁড়াই, কত কী যে হয় বলা,
শুধু মনে জানি বাজিল না বীণাতারে
পরমের সুরে চরমের গীতিকলা ॥

চকিত আলোকে কখনো সহসা দেখা দেয় সুন্দর,
—দেয় না ভবুও ধরা,
মাটির ছয়ার ক্ষণেক খুলিয়া আপন গোপন ঘর
দেখায় বসুন্ধরা ।

সেঁজুতি

আলোকধামের আভাস সেথায় আছে
মর্ত্যের বৃকে অমৃত পাত্রে ঢাকা ;
ফাঙ্কন সেথায় মজ্জ লাগায় গাছে,
অরূপের রূপ পল্লবে পড়ে আঁকা ॥

তারি আস্থানে সাড়া দেয় শ্রাণ, জাপে বিস্তৃত সুর,
নিজ অর্থ না জানে ।

ধূলিময় বাধাবন্ধ এড়ায়ে চলে যাই বহুদূর
আপনারি গানে গানে ।

দেখেছি, দেখেছি, এই কথা বলিবারে
সুর বেধে যায়, কথা না জোগায় মুখে,
ধন্য যে আমি সে কথা জানাই কারে
পরশাতীতের হরষ জাগে যে বৃকে ॥

হৃৎ পেয়েছি, দৈন্ত্য ঘিরেছে, অল্লীল দিনে রাতে

দেখেছি কুশ্রীতারে,

মানুষের প্রাণে বিষ মিশায়েছে মানুষ আপন হাতে

ঘটেছে তা করে বারে ।

সেঁজুতি

তবু তো বধির করেনি শ্রবণ কভু,
বেশ্বর ছাপায়ে, কে দিয়েছে স্মর আনি,
পরুষ-কলুষ ঝঞ্ঝায় শুনি তবু
চিরদিবসের শাস্ত শিবের বাণী ।

যাহা জানিবার কোনোকালে তার জেনেছি যে কোনো কিছু
—কে তাহা বলিতে পারে ।

সকল পাওয়ার মাঝে না-পাওয়ার চলিয়াছি পিছু পিছু
অচেনার অভিসারে ।

তবুও চিত্ত অহেতু আনন্দেতে
বিশ্বনৃত্যলীলায় উঠেছে মেতে ।
সেই ছন্দেই মুক্তি আমার পাব,
মৃত্যুর পথে মৃত্যু এড়ায়ে যাব ।

ওই শুনি আমি চলেছে আকাশে ঝাঁধনছেঁড়ার রবে
নিখিল আত্মহারা ।

ওই দেখি আমি অস্তবিহীন সত্তার উৎসবে
ছুটেছে প্রাণের ধারা ।

সে ধারার বেগ লেগেছে আমার মনে,
এ ধরণী হতে বিদায় নেবার ক্ষণে ;
নিবিয়ে ফেলিব ঘরের কোণের বাতি,
যাব অলক্ষ্যে সূর্যতারার সাথী ॥

সেঁজুতি

কী আছে জানি না দিন-অবসানে মৃত্যুর অবশেষে ;

এ প্রাণের কোনো ছায়া

শেষ আলো দিয়ে ফেলিবে কি রং অস্তরবির দেশে,

রচিবে কি কোনো মায়া ।

জীবনেরে যাহা জেনেছি, অনেক তাই,

সীমা থাকে থাক্, তবু তার সীমা নাই।

নিবিড় তাহার সত্য আমার প্রাণে

নিখিল ভুবন ব্যাপিয়া নিজেই জানে ॥

মংগু, দার্জিলিং

১৬ জ্যৈষ্ঠ, ১৩৪৫

যাবার মুখে

যাক্ এ জীবন,
যাক্ নিয়ে যাহা টুটে যায়, যাহা
ছুটে যায়, যাহা
ধূলি হয়ে লোটে ধূলি'পরে, চোরা
মৃত্যুই যার অন্তরে, যাহা
রেখে যায় শুধু ফাঁক ।
যাক্ এ জীবন পুঞ্জিত তার জঞ্জাল নিয়ে যাক্ ।
টুকরো যা থাকে ভাঙা পেয়ালার,
ফুটো সেতারের সুরহারা তার,
শিখা-নিবে-যাওয়া বাতি,
স্বপ্নশেষের ক্লাস্তি-বোঝাই রাতি ;—
নিয়ে যাক্ যত দিনে দিনে জমা-করা
প্রবঞ্চনায় ভরা
নিষ্ফলতার সমস্ত সঞ্চয় ।
কুড়ায়ে ঝাঁটায়ে মুছে নিয়ে যাক, নিয়ে যাক শেষ করি'
ভাঁটার স্রোতের শেষ-খেয়া-দেওয়া তরী ।

সেঁজুতি

নিঃশেষ যবে হয় যত কিছু ফাঁকি
তবুও যা রয় বাকি—
জগতের সেই
সকল কিছুর অবশেষেতেই
কাটায়েছি কাল যত অকাজের বেলায়,
মন ভোলাবার অকারণ গানে কাজ-ভোলাবার খেলায় ।
সেখানে যাহারা এসেছিল মোর পাশে
তা'রা কেহ নয় তা'রা কিছু নয় মাল্লুষের ইতিহাসে ।
শুধু অসীমের ইশারা তাহারা এনেছে আঁখির কোণে,
অমরাবতীর নৃত্যনূপুর বাজিয়ে গিয়েছে মনে ।
দখিন হাওয়ার পথ দিয়ে তা'রা উকি মেরে গেছে দ্বারে,
কোনো কথা দিয়ে তাদের কথা যে বুঝাতে পারিনি কারে ।
রাজা মহারাজ মিলায় শূন্যে ধুলার নিশান তুলে,
তা'রা দেখা দিয়ে চলে যায় যবে ফুটে ওঠে ফুলে ফুলে ।
থাকে নাই থাকে কিছুতেই নেই ভয়,
যাওয়ায় আসায় দিয়ে যায় ওরা নিত্যের পরিচয় ।
অজানা পথের নামহারা ওরা লজ্জা দিয়েছে মোরে
হাটে বাটে যবে ফিরেছি কেবল নামের ঝেঁসাতি ক'রে ॥

আমার ছুয়ারে আঙিনার ধারে ঐ চামেলির লতা
কোনো ছুদিনে করে নাই কুণ্ণতা ।

সেঁজুতি

ওই যে শিমূল ওই যে সজিনা আমারে বেঁধেছে ঋণে,—
কত যে আমার পাগলামি-পাওয়া দিনে
কেটে গেছে বেলা শুধু চেয়ে-থাকা মধুর মৈতালিতে,
নীল আকাশের তলায় ওদের সবুজ বৈতালিতে ।
সকালবেলার প্রথম আলোয় বিকালবেলার ছায়ায়
দেহপ্রাণমন ভরেছে সে কোন্ অনাদিকালের মায়ায় ।
পেয়েছি ওদের হাতে
দূর জনমের আদি পরিচয় এই ধরণীর সাথে ।
অসীম আকাশে যে প্রাণ-কাঁপন অসীম কালের বুকে
নাচে অবিরাম, তাহারি বারতা শুনেছি ওদের মুখে ।
যে মন্ত্রখানি পেয়েছি ওদের স্মরে
তাহার অর্থ মৃত্যুর সীমা ছাড়ায়ে গিয়েছে দূরে ।
সেই সত্যেরি ছবি
তিমিরপ্রাস্তে চিত্তে আমার এনেছে প্রভাত-রবি ।
সে রবিরে চেয়ে কবির সে বাণী আসে অন্তরে নামি’—
“যে আমি রয়েছে তোমার আশ্রয়ে সে আমি আমারি আমি ।”
সে আমি সকল কালে,
সে আমি সকল খানে,
প্রেমের পরশে সে অসীম আমি বেজে ওঠে মোর গানে ।

যায় যদি তবে যাক,
এল যদি শেষ ডাক,—

সেঁ জুতি

অসীম জীবনে এ ক্ষীণ জীবন শেষ রেখা এঁকে যাক,
মৃত্যুতে ঠেকে যাক ।
যাক নিয়ে যাহা টুটে যায়, যাহা
ছুটে যায়, যাহা
ধূলি হয়ে লুটে ধূলি'পরে, চোরা
মৃত্যুই যার অন্তরে, যাহা
রেখে যায় শুধু ফাঁক—
যাক নিয়ে তাহা, যাক এ জীবন যাক ॥

শাস্তিনিকেতন

২২ মাঘ, ১৩৪৩

সেঁজুতি

অমর্ত্য

আমার মনে একটুও নেই বৈকুণ্ঠের আশা।—

ঐখানে মোর বাসা

যে মাটিতে শিউরে ওঠে ঘাস,

যার পরে ঐ মস্ত পড়ে দক্ষিণে বাতাস।

চিরদিনের আলোক-জ্বালা নীল আকাশের নিচে

যাত্রা আমার নৃত্য-পাগল নটরাজের পিছে।

ফুল ফোটাবার যে রাগিণী বকুল শাখায় সাধা

নিষ্কারণে ওড়ার আবেগ চিলের পাখায় বাঁধা,

সেই দিয়েছে রক্তে আমার চেউয়ের দোলাহুলি

স্বপ্নলোকে সেই উড়েছে সুরের পাখনা তুলি’।

দায়-ভোলা মোর মন

মন্দে ভালোয় সাদায় কালোয় অঙ্কিত প্রাঙ্গণ

ছাড়িয়ে গেছে দূর দিগন্তপানে

আপন বাঁশির পথ-ভোলানো তানে।

সেঁজুতি

দেখা দিল দেহের অতীত কোন্ দেহ এই মোর,
ছিন্ন করি' বস্ত্রবঁধন ডোর।
শুধু কেবল বিপুল অমুভূতি,
গভীর হতে বিচ্ছুরিত আনন্দময় দ্যুতি,
শুধু কেবল গানেই ভাষা যার,
পুষ্পিত ফাল্গুনের ছন্দে গন্ধে একাকার ;
নিমেষহারা চেয়ে-থাকার দূর অপারের মাঝে
ইঙ্গিত যার বাজে।
যে-দেহেতে মিলিয়ে আছে অনেক ভোরের আলো,
নাম-না-জানা অপূর্বে যার লেগেছে ভালো,
যে-দেহেতে রূপ নিয়েছে অনির্বচনীয়
সকল প্রিয়ের মাঝখানে যে প্রিয়,
পেরিয়ে মরণ সে মোর সঙ্গে যাবে
কেবল রসে, কেবল স্মরে, কেবল অমুভাবে ॥

শান্তিনিকেতন

১১।৩।৩৭

সেঁজুতি

পলায়নী

যে পলায়নের অসীম তরঙ্গী
বাহিছে সূর্যতার।
সেই পলায়নে দিবসরজনী
ছুটেছ গঙ্গাধারা ।
চিরধাবমান নিখিল বিশ্ব
এ পলায়নের বিপুল দৃশ্য,
এই পলায়নে ভূত ভবিষ্য
দীক্ষিছে ধরণীরে ।
জলের ছায়া সে দ্রুততালে বয়,
কঠিন ছায়া সে ঐ লোকালয়,
একই প্রলয়ের বিভিন্ন লয়
স্থিরে আর অস্থিরে ॥

সেঁজুতি

সৃষ্টি যখন আছিল নবীন
নবীনতা নিয়ে এলে ।
ছেলেমাহুঘির শ্রোতে নিশিদিন
চলো অকারণ খেলে ।
লীলাছলে তুমি চির পথহারা,
বন্ধনহীন নৃত্যের ধারা,
তোমার কূলেতে সীমা দিয়ে কা'রা
বাঁধন গড়িছে মিছে ।
আবাঁধা ছুঁতে হেসে যাও সারি'
পাথরের যুঁচি শিথিলিত করি',
বাঁধা ছন্দের নগরনগরী
ধুলায় মিলায় পিছে ॥

অচঞ্চলের অমৃত বরিষে
চঞ্চলতার নাচে ।
বিখলীলা তো দেখি কেবলি সে
নেই নেই ক'রে আছে ।
ভিত কেঁদে যারা তুলিছে দেয়াল
তা'রা বিধাতার মানে না খেয়াল,
তা'রা বুঝিল না,—অনন্তকাল
অচির কালেরই মেলা ।

সে জুতি

বিজয় তোরণ গাঁথে তা'রা যত
আপনার ভারে ভেঙে পড়ে তত,
খেলা করে কাল বালকের মতো
ল'য়ে তার ভাঙা ঢেলা ॥

ওরে মন, তুই চিন্তার টানে
বাঁধিস নে আপনারে,
এই বিশ্বের সুদূর ভাসানে
অনায়াসে ভেসে যা রে ॥
কী গেছে তোমার কী হয়েছে আর
নাই ঠাই তার হিসাব রাখার,
কী ঘটতে পারে জবাব তাহার
নাইবা মিলিল কোনো ।
ফেলিতে ফেলিতে যাহা ঠেকে হাতে,
তাই পরশিয়া চলো দিনে রাতে,
যে সুর বাজিল মিলাতে মিলাতে
তাই কান দিয়ে শোনো ॥

এর বেশি যদি আরো কিছু চাও
ছঃখই তাহে মেলে ।
যেটুকু পেয়েছ তাই যদি পাও
তাই নাও, দাও ফেলে ।

সেঁজুতি

যুগ যুগ ধরি' জেনো মহাকাল
চলার নেশায় হয়েছে মাতাল,
ডুবিছে ভাসিছে আকাশ পাতাল
আলোক আঁধার বহি' ।
দাঁড়াবে না কিছু তব আস্থানে,
ফিরিয়া কিছু না চাবে তোমা পানে,
ভেসে যদি যাও যাবে একখানে
সকলের সাথে রহি' ॥

শান্তিনিকেতন

১২ চৈত্র, ১৩৪৩

সেঁজুতি

স্মরণ

যখন রবো না আমি মর্ত্যকায়
তখন স্মরণে যদি হয় মন
তবে তুমি এসো হেথা নিভৃত ছায়ায়
যেথা এই চৈত্রের শালবন ।

হেথায় যে মঞ্জরী দোলে শাখে শাখে
পুচ্ছ নাচায় যত পাখি গায়,
ওরা মোর নাম ধ'রে কভু নাহি ডাকে
মনে নাহি করে বসি' নিরালায় ।
কত যাওয়া কত আসা এই ছায়াতলে
আনমনে নেয় ওরা সহজেই,
মিলায় নিমেষে কত প্রতি পলে পলে
হিসাব কোথাও তার কিছু নেই ।

ওদের এনেছে ডেকে আদি সমীরণে
ইতিহাস-লিপিহারা যেই কাল
আমারে সে ডেকেছিল কভু খনে খনে
রক্তে বাজিয়েছিল তারি তাল ।

সেঁজুতি

সেদিন ভুলিয়াছি কীৰ্তি ও খ্যাতি
বিনাপথে চলেছিল ভোলা মন,
চারিদিকে নামহারা ক্ষণিকের জ্ঞাতি
আপনারে করেছিল নিবেদন ।
সেদিন ভাবনা ছিল মেঘের মতন
কিছু নাহি ছিল ধরে রাখিবার,
সেদিন আকাশে ছিল রূপের স্বপন,
রং ছিল উড়ো ছবি আঁকিবার ।
সেদিনের কোনো দানে ছোটো বড়ো কাজে
স্বাক্ষর দিয়ে দাবি করি নাই,
যা লিখেছি যা মুছেছি শৃঙ্খল মাঝে
মিলায়েছে, দাম তার ধরি নাই ।

সেদিনের হারা আমি,—চিহ্নবিহীন
পথ বেয়ে কোরো তার সন্ধান,
হারাতে হারাতে যেথা চলে যায় দিন,
ভরিতে ভরিতে ডালি অবসান ।
মাঝে মাঝে পেয়েছিল আহ্বান পাঁতি
যেখানে কালের সীমা-রেখা নেই,—
খেলা করে চলে যায় খেলিবার সাথী
গিয়েছিল দায়হীন সেখানেই ।

সেঁজুতি

দিই নাই, চাই নাই রাখিনি কিছুই
ভালোমন্দের কোনো জঞ্জাল,
চলে-যাওয়া ফাণ্ডনের ঝরা ফুলে ভুঁই
আসন পেতেছে মোর ক্ষণকাল ।
সেইখানে মাঝে মাঝে এল যারা পাশে
কথা তা'রা ফেলে গেছে কোন্ ঠাই ;
সংসার তাহাদের ভোলে অনায়াসে,
সভাঘরে তাহাদের স্থান নাই ।
বাসা যার ছিল ঢাকা জনতার পারে,
ভাষাহারাদের সাথে মিল যার,
যে-আমি চায়নি কারে ঋণী করিবারে,
রাখিয়া যে যায় নাই ঋণভার
সে-আমারে কে চিনেছে মর্ত্যকায়্য,
কখনো স্মরিতে যদি হয় মন,
ডেকো না ডেকো না সভা, এসো এ ছায়ায়
যেথা এই চৈত্রের শালবন ॥

সন্ধ্যা

চলেছিল সারা প্রহর
আমায় নিয়ে দূরে
যাত্রী বোঝাই দিনের নৌকো।
অনেক ঘাটে ঘুরে।
দূর কেবলি বেড়ে ওঠে
সামনে যতই চাই,
অন্ত যে তার নাই।
দূর ছড়িয়ে রইল দিকে দিকে,
আকাশ থেকে দূর চেয়ে রয় নির্নিমিখে।
দিনের রোজ্রে বাজতে থাকে
যাত্রাপথের সুর,
অনেক দূর যে অনেক অনেক দূর।

সেঁজুতি

ওগো সন্ধ্যা শেষ গ্রহরের নেয়ে,
ভাসাও খেয়া ভাঁটার গঙ্গা বেয়ে ।
পৌঁছিয়ে দাও কূলে,
যেথায় আছ অতি-কাছের
দুয়ারখানি খুলে ।
ঐ যে তোমার সন্ধ্যাতারা
মনকে ছুঁয়ে আছে,
ছায়ায় ঢাকা আমলকি বন
এগিয়ে এল কাছে ।

দিনের আলো সবার আলো
লাগিয়েছিল ধাঁদা,—
অনেক সেথায় নিবিড় হয়ে
দিল অনেক বাধা ।
নানান-কিছু ছুঁয়ে ছুঁয়ে
হারানো আর পাওয়ায়
নানানদিকে ধাওয়ায় ।
সন্ধ্যা ওগো কাছের তুমি,
ঘনিয়ে এসো প্রাণে,—
আমার মধ্যে তারে জাগাও
কেউ যারে না জানে ।

সেঁ জুতি

ধীরে ধীরে দাও আঙিনায় আনি
একলারি দীপখানি,
মুখোমুখি চাওয়ার সে দীপ,
কাছাকাছি বসার,
অতি-দেখার আবরণটি খসার ।
সব-কিছুরে সরিয়ে, করো
একটু-কিছুর ঠাই—
যার চেয়ে আর নাই ॥

শাস্তিনিকেতন

২২/৪/৩৭

সেঁজুতি

ভাগীরথী

পূর্ব যুগে, ভাগীরথী, তোমার চরণে দিল আনি
মর্ত্যের ক্রন্দনবাণী ;
সঞ্জীবনী তপস্যায় ভগীরথ
উত্তরিল দুর্গম পর্বত,
নিয়ে গেল তোমা কাছে মৃত্যুবন্দী প্রেতের আহ্বান,—
ডাক দিল, আনো আনো প্রাণ,
নিবেদিল, হে চৈতন্যস্বরূপিণী তুমি,
গৈরিক অঞ্চল তব চুমি’
তুণে শম্পে রোমাঙ্কিত হোক মরুতল ;
ফলহীনে দাও ফল,
পুষ্পবক্ষ্যালতিকার ঘুচাও ব্যর্থতা,
নির্বাক ভূমির মুখে দাও কথা ।
তুমি যে প্রাণের ছবি,
হে জাহ্নবী,—

সেঁজুতি

ধরণীর আদিশুষ্টি ভেঙে দিয়ে যেথা যাও চলে
জাগ্রত কল্লোলে
গানে মুখরিয়া উঠে মাটির প্রাঙ্গণ,
ছই তীরে জেগে ওঠে বন ;
তট বেয়ে মাথা তোলে নগর নগরী
জীবনের আয়োজনে ভাণ্ডার ঐশ্বর্যে ভরি' ভরি' ।

মানুষের মুখ্যভয় মৃত্যুভয়,
কেমনে করিবে তারে জয়,
নাহি জানে ;
তাই সে হেরিছে ধ্যানে
মৃত্যুবিজয়ীর জটা হতে
অক্ষয় অমৃত স্রোতে
প্রতিক্ষণে নামিছ ধরায় ।
পুণ্যতীর্থতটে সে যে তোমার প্রসাদ পেতে চায় ।

সে ডাকিছে, মিথ্যা শঙ্কা নাগপাশ ঘুচাও ঘুচাও,
মরণেরে যে কালিমা লেপিয়াছি সে তুমি মুছাও ;
গম্ভীর অভয় মূর্তি মরণের
তব কলধ্বনি মাঝে গান ঢেলে দিক্ তরণের
এ জন্মের শেষ ঘাটে ;

সেঁজুতি

নিরুদ্দেশ যাত্রীর ললাটে
স্পর্শ দিচ্ আশীর্বাদ তব,
নিচ্ সে নূতন পথে যাত্রার পাথেয় অভিনব ;
শেষ দণ্ডে ভরে দিচ্ তার কান
অজানা সমুদ্রপথে তব নিত্য অভিসার গান ॥

শান্তিনিকেতন

২৬/৪/৩৭

তীর্থযাত্রিনী

তীর্থের যাত্রিনী ও যে, জীবনের পথে
শেষ আধক্রোশটুকু টেনে টেনে চলে কোনোমতে ।
হাতে নাম-জপ ঝুলি,
পাশে তার রয়েছে পুঁটুলি ।
ভোর হতে ধৈর্য ধরি' বসি' ইন্স্টেশনে
অস্পষ্ট ভাবনা আসে মনে,
আর কোনো ইন্স্টেশনে আছে যেন আর কোনো ঠাই,
যেথা সব ব্যর্থতাই
আপনায়
হারানো অর্ঘ্যে ফিরে পায়.
যেথা গিয়ে ছায়া
কোনো এক রূপ ধরি' পায় যেন কোনো এক কায়া ।
বুকের ভিতরে ওর পিছু হতে দেয় দোল,
আশৈশব-পরিচিত দূর সংসারের কলরোল ।
প্রত্যাখ্যাত জীবনের প্রতিহত আশা
অজানার নিরুদ্দেশে প্রদোষে খুঁজিতে চলে বাসা ।

সেঁজুতি

যে পথে সে করেছিল যাত্রা একদিন
সেখানে নবীন
আলোকে, আকাশ ওর মুখ চেয়ে উঠেছিল হেসে।
সে পথে পড়েছে আজ এসে
অজানা লোকের দল,
তাদের কণ্ঠের ধ্বনি ওর কাছে ব্যর্থ কোলাহল।
যে যৌবনখানি
একদিন পথে যেতে বল্লভেরে দিয়েছিল আনি
মধুমদিরার রসে বেদনার নেশা
হুঃখে স্মৃখে নেশা,
সে রসের রিক্ত পাত্রে আজ শুষ্ক অবহেলা,
মধুপগুঞ্জনহীন যেন ক্লান্ত হেমন্তের বেলা।

আজিকে চলেছে যারা খেলার সঙ্গীর আশে
ওরে ঠেলে যায় পথপাশে ;
যে খুঁজিছে দুর্গমের সাথী
ও পারে না তার পথে জ্বালাইতে বাতি
জীর্ণ কম্পমান হাতে
দুর্যোগের রাতে।
একদিন যারা সবে এ পথ নির্মাণে
লেগেছিল আপনার জীবনের দানে,

সেঁজুতি

ও ছিল তাদের মাঝে
নানা কাজে,
সে পথ উহার আজ নহে ।
সেথা আজি কোন্ দূত কী বারতা বহে
কোন্ লক্ষ্য পানে
নাহি জানে ।
পরিত্যক্ত এক! বসি' ভাবিতেছে পাবে বুঝি দূরে
সংসারের গ্লানি ফেলে স্বর্গ-ঘেঁষা দুর্মূল্য কিছুরে ।
হায় সেই কিছু
যাবে ওর আগে আগে প্রেতসম, ও চলিবে পিছু
ক্ষীণালোকে, প্রতিদিন ধরি-ধরি করি' তারে
অবশেষে মিলাবে আঁধারে ।

আলমোড়া

২২ মে, ১৯৩৭

সেঁজুতি

নতুন কাল

কোন্ সে কালের কণ্ঠ হতে এসেছে এই স্বর—
“এপার গঙ্গা ওপার গঙ্গা মধ্যখানে চর।”

অনেক বাণীর বদল হোলো, অনেক বাণী চূপ,
নতুন কালের নটরাজা নিল নতুন রূপ।
তখন যে সব ছেলেমেয়ে শুনেছে এই ছড়া,
তা’রা ছিল আরেক ছাঁদে গড়া।

প্রদীপ তা’রা ভাসিয়ে দিত পূজা আনত তীরে,
কী জানি কোন্ চোখে দেখত মকরবাহিনীরে।

তখন ছিল নিত্য অনিশ্চয়,
ইহকালের পরকালের হাজার রকম ভয়।
জাগত রাজার দারুণ খেয়াল, বর্গি নামত দেশে,
ভাগ্যে লাগত ভূমিকম্প হঠাৎ এক নিমেষে।
ঘরের থেকে খিড়কি ঘাটে চলতে হোত ডর,
লুকিয়ে কোথায় রাজদম্ভুর চর।

আঙিনাতে গুনত পালাগান,
বিনা দোষে দেবীর কোপে সাধুর অসম্মান।

সেঁজুতি

সামান্য ছুতায়

ঘরের বিবাদ গ্রামের শত্রুতায়
গুপ্ত চালের লড়াই যেত লেগে,
শক্তিমানের উঠত গুমর জেগে।

হারত যে তার ঘুচত পাড়ায় বাস,
ভিটেয় চলত চাষ।

ধর্মছাড়া কারো নামে পাড়বে যে দোহাই
ছিল না সেই ঠাই।

ফিস্‌ফিসিয়ে কথা কওয়া সংকোচে মন ঘেরা,
গৃহস্থবো, জিব কেটে তার হঠাৎ পিছন-ফেরা ;
আলতা পায়ে, কাজল চোখে, কপালে তার টিপ,
ঘরের কোণে জ্বালে মাটির দীপ।

মিনতি তার জলেস্থলে, দোহাই-পাড়া মন,
অকল্যাণের শঙ্কা সারাক্ষণ।

আয়ুলাভের তরে

বলির পশুর রক্ত লাগায় শিশুর ললাট 'পরে।
রাত্রিদিবস সাবধানে তার চলা,
অশুচিতার ছোঁয়াচ কোথায় যায় না কিছুই বলা।
ওদিকেতে মাঠে বাটে দস্যুরা দেয় হানা,
এদিকে সংসারের পথে অপদেবতা নানা।
জানা কিংবা না-জানা সব অপরাধের বোঝা,
ভয়ে তারি হয় না মাথা সোজা।

সেঁজুতি

এরি মধ্যে গুন্তুনিয়ে উঠল কাহার স্বর—

“এপার গজা ওপার গজা, মধ্যখানে চর।”

সেদিনো সেই বইতেছিল উদার নদীর ধারা,
ছায়া-ভাসান দিতেছিল সাজ সকালের তারা।
হাটের ঘাটে জমেছিল নৌকো মহাজনী,
রাত না যেতে উঠেছিল দাঁড়-চালানো ধ্বনি।

শান্ত প্রভাত কালে

সোনার রৌদ্র পড়েছিল জ্বলেডিঙির পালে।

সন্ধ্যাবেলায় বন্ধ আসা-যাওয়া,

হাঁসবলাকার পাখার ঘায়ে চমকেছিল হাওয়া।

ডাঙায় উম্মন পেতে

রাগা চড়েছিল মাঝির বনের কিনারেতে।

শেয়াল ক্ষণে ক্ষণে

উঠতেছিল ডেকে ডেকে ঝাউয়ের বনে বনে

কোথায় গেল সেই নবাবের কাল,

কাজির বিচার, শহর কোতোয়াল।

পুরাকালের শিক্ষা এখন চলে উজান-পথে,

ভয়ে-কাঁপা যাত্রা সে নেই বলদটানা রথে।

সেঁজুতি

ইতিহাসের গ্রন্থে আরো খুলবে নতুন পাতা,

নতুন রীতির সূত্রে হবে নতুন জীবন গাঁথা ।

যে হোক রাজা যে হোক মন্ত্রী কেউ র'বে না তা'রা,

বইবে নদীর ধারা,

জেলেডিঙি চিরকালের, নৌকো মহাজনী,

উঠবে দাঁড়ের ধ্বনি ।

প্রাচীন অশথ আধা ডাঙায় জলের 'পরে আধা,

সারারাত্রি গুঁড়িতে তার পান্সি রইবে বাঁধা ।

তখনো সেই বাজবে কানে যখন যুগান্তর

“এপার গঙ্গা ওপার গঙ্গা মধ্যখানে চর ।”

আলমোড়া

২৫ মে, ১৯৬৭

সেঁজুতি

চল্‌তি ছবি

রোদ্‌দুরেতে ঝাপসা দেখায় ঐ যে দূরের গ্রাম
যেমন ঝাপসা না-জানা ওর নাম ।
পাশ দিয়ে যাই উড়িয়ে ধূলি, শুধু নিমেষতরে
চল্‌তি ছবি পড়ে চোখের 'পরে ।

দেখে গেলেম, গ্রামের মেয়ে কলসি-মাথায়-ধরা,
রঙিন-শাড়ি-পরী,
দেখে গেলেম, পথের ধারে ব্যবসা চালায় মুদি ;
দেখে গেলেম, নতুন বধু আধেক ছয়ার রুধি'
ঘোমটা থেকে ফাঁক ক'রে তার কালো চোখের কোণা
দেখছে চেয়ে পথের আনাগোনা ।
বাঁধানো বটগাছের তলায় পড়তি রোদের বেলায়
গ্রামের ক'জন মাতব্বরে মগ্ন তাসের খেলায় ।

সেঁজুতি

এইটুকুতে চোখ বুলিয়ে আবার চলি ছুটে,
এক মুহূর্তে গ্রামের ছবি ঝাপসা হয়ে উঠে।

এই না-জানা গ্রামের প্রান্তে সকাল বেলায় পুবে
সূর্য ওঠে, সন্ধ্যা বেলায় পশ্চিমে যায় ডুবে।

দিনের সকল কাজে,

স্বপ্নদেখা রাতের নিদ্রামাঝে,

এ ঘরে, এ মাঠে,

এখানে জল-আনার পথে ভিজে পায়ের ঘাটে,

পাখিডাকা এ গ্রামেরি প্রাতে,

এ গ্রামেরি দিনের অস্তে স্তিমিত-দীপ রাতে

তরঙ্গিত দুঃখসুখের নিত্য ওঠা-নাবা,

কোনোটা বা গোপন মনে, বাইরে কোনোটা বা।

তা'রা যদি তুলত ধ্বনি, তাদের দীপ্ত শিখা

এ আকাশে লিখত যদি লিখা,

রাত্রিদিনকে কাঁদিয়ে-তোলা ব্যাকুল প্রাণের ব্যথা

পেত যদি ভাষার উদ্বেলতা,

তবে হোথায় দেখা দিত পাথর-ভাঙা স্রোতে

মানব-চিত্ত তুঙ্গ-শিখর হতে

সাগর-খোঁজা নির্ঝর সেই, গর্জিয়া নর্তিয়া

ছুটছে যাহা নিত্যকালের বক্ষে আবর্তিয়া

কাল্মাহাসির পাকে,

সেঁজুতি

তাহা হোলে তেমনি করেই দেখে নিতেম তাকে
চমক লেগে হঠাৎ পথিক দেখে যেমন ক'রে
নায়েগারার জলপ্রপাত অবাক্ দৃষ্টি ভ'রে ।

যুদ্ধ লাগল স্পেনে ;
চলছে দারুণ ভ্রাতৃহত্যা শতশ্লীবাণ হেনে ।
সংবাদ তার মুখর হোলো দেশমহাদেশ জুড়ে,
সংবাদ তার বেড়ায় উড়ে উড়ে
দিকে দিকে যন্ত্র-গরুড় রথে
উদয়-রবির পথ পেরিয়ে অন্তরবির পথে ।
কিন্তু যাদের নাই কোনো সংবাদ,
কণ্ঠে যাদের নাইকো সিংহনাদ,
সেই যে লক্ষকোটি মানুষ কেউ কালো কেউ ধলো,
তাদের বাণী কে শুনছে আজ বলো ।
তাদের চিন্ত-মহাসাগর উদ্দাম উদ্ভাল
মগ্ন করে অন্তবিহীন কাল ;
ঐ তো তাহা সম্মুখেতেই, চারদিকে বিস্তৃত
পৃথ্বীজোড়া মহাতুফান, তবু দোলায় নি তো
তাহারি মাঝখানে-বসা আমার চিন্তখানি ।
এই প্রকাণ্ড জীবননাট্যে, কে দিয়েছে টানি'

লেক্তি

প্রকাণ্ড এক অটল যবনিকা ।
ওদের আপন ক্ষুদ্র প্রাণের শিখা
যে আলো দেয় একা,
পূর্ণ ইতিহাসের মূর্তি যায় না তাহে দেখা ।

এই পৃথিবীর প্রাপ্ত হতে বিজ্ঞানীদের দৃষ্টি
জেনেছে আজ তারার বক্ষে উজ্জ্বলিত সৃষ্টি
উন্মথিত বহ্নি-সিঙ্কু-প্লাবন নির্ঝরে
কোটি যোজন দূরত্বেরে নিত্য লেহন করে ।
কিন্তু এই যে এই মুহূর্তে বেদন হোমানল
আলোড়িছে বিপুল চিন্ততল
বিশ্বধারায় দেশে দেশান্তরে
লক্ষ লক্ষ ঘরে,
আলোক তাহার দাহন তাহার, তাহার প্রদক্ষিণ
যে অদৃশ্য কেন্দ্রে ঘিরে চলছে রাত্রিদিন
তাহা মর্ত্যজনের কাছে
শান্ত হয়ে স্তব্ধ হয়ে আছে ।
যেমন শান্ত যেমন স্তব্ধ দেখায় মুগ্ধ চোখে
বিরামহীন জ্যোতির ঝঞ্জা নক্ষত্র আলোকে ।

আলমোড়া

সেঁজুতি

ঘর ছাড়া

তখন একটা রাত,—উঠেছে সে তড়বড়ি,
কাঁচা ঘুম ভেঙে । শিয়রেতে ঘড়ি
কর্কশ সংকেত দিল নিম্ন স্বনিতে ।
অস্ত্রাণের শীতে
এ বাসার মেয়াদের শেষে
যেতে হবে আত্মীয়-পরশহীন দেশে
ক্ষমাহীন কত ব্যের ডাকে ।
পিছে পড়ে থাকে
এবারের মতো
ত্যাগযোগ্য গৃহসজ্জা যত ।
জরাগ্রস্ত তক্তপোস কালিমাখা শতরঞ্চ পাতা ;
আরামকেদারা ভাঙা-হাতা ;
পাশের শোবার ঘরে
হেলে-পড়া টিপয়ের 'পরে
পুরোনো আয়না দাগ-ধরা ;
পোকা-কাটা হিসাবের খাতা-ভরা

সেঁজুতি

কাঠের সিন্দুক এক ধারে ;
দেয়ালে ঠেসান-দেওয়া সারে সারে
বহু বৎসরের পাঁজি ;
কুলুঙ্গিতে অনাদৃত পূজার ফুলের জীর্ণ সাজি ।
প্রদীপের স্তিমিত শিখায়
দেখা যায়
ছায়াতে জড়িত তা'রা
স্তম্ভিত রয়েছে অর্থহারা ।

ট্যাক্সি এল দ্বারে, দিল সাড়া
হংকার পরুষরবে । নিদ্রায় গস্তীর পাড়া
রহে উদাসীন ।
গ্রহরীশালায় দূরে বাজে সাড়ে তিন ।

শূণ্যপানে চক্ষু মেলি'
দীর্ঘশ্বাস ফেলি'
দূরযাত্রী নাম নিল দেবতার,
তালা দিয়ে রুখিল দুয়ার ।
টেনে নিয়ে অনিচ্ছুক দেহটির
দাঁড়াল বাহিরে ।

সেঁজুতি

উৎসর্গ কালো আকাশের ফাঁকা
ঝাঁট দিয়ে, চলে গেল বাতুড়ের পাখা ।
যেন সে, নির্মম
অনিশ্চিত-পানে-ধাওয়া অদৃষ্টের প্রেতচ্ছায়াসূম ।
বৃদ্ধবট মন্দিরের ধারে,
অজগর অঙ্ককার গিলিয়াছে তারে ।
সদ্য মাটিকাটা পুকুরের
পাড়ি ধারে বাসা বাঁধা মজুরের
খেজুরের পাতা-ছাওয়া,—ক্ষীণ আলো করে মিট মিট,
পাশে ভেঙে-পড়া পঁজা । তলায় ছড়ানো তার ইট ।
রজনীর মসৌলিগুণ্ডি মাঝে
লুপ্তরেখা সংসারের ছবি,—ধানকাটা কাজে
সারাবেলা চাষীর ব্যস্ততা ;
গলা-ধরাধরি কথা
মেয়েদের ; ছুটি-পাওয়া
ছেলেদের ধৈর্য-যাওয়া
হৈ হৈ রবে ; হাটবারে ভোরবেলা
বস্তা-বহা গোরুটাকে তাড়া দিয়ে ঠেলা,—
আঁকড়িয়া মহিষের গলা
ওপারে মাঠের পানে রাখাল ছেলের ভেসে-চলা ।
নিত্যজানা সংসারের প্রাণলীলা না উঠিতে ফুটে
যাত্রী লয়ে অঙ্ককারে গাড়ি যায় ছুটে ।

সেঁজুতি

যেতে যেতে পথপাশে
পানা পুকুরের গন্ধ আসে,
সেই গন্ধে পায় মন
বহু দিনরজনীর সক্রমণ স্নিগ্ধ আলিঙ্গন ।
আঁকাবাঁকা গলি
রেলের স্টেশনপথে গেছে চলি ;
ছুই পাশে বাসা সারি সারি ;
নরনারী
যে যাহার ঘরে
রহিল আরাম শয্যা 'পরে ।
নিবিড় আঁধার-ঢালা আমবাগানের কাঁকে
অসীমের টিকা দিয়া বরণ করিয়া স্তব্ধতাকে
শুকতারা দিল দেখা ।
পথিক চলিল একা
অচেতন অসংখ্যের মাঝে ।
সাথে সাথে জনশূন্য পথ দিয়ে বাজে
রথের চাকার শব্দ হৃদয়বিহীন ব্যস্ত সুরে
দূর হতে দূরে ॥

ত্রীনিকেতন

২২ নভেম্বর, ১৯৩৬

সেঁজুতি

জন্মদিন

দৃষ্টিজালে জড়ায় ওকে হাজারখানা চোখ,
ধ্বনির ঝড়ে বিপন্ন ঐ লোক ।
জন্মদিনের মুখর তিথি যারা ভুলেই থাকে,
দোহাই ওগো, তাদের দলে লও এ মানুষটাকে,
সজ্জনে পাতার মতো যাদের হাল্কা পরিচয়,
ছলুক খস্ক শব্দ নাহি হয় ।

সবার মাঝে পৃথক ও যে ভিড়ের কারাগারে
খ্যাতি-বেড়ির নিরস্ত বংকারে ।
সবাই মিলে নানা রঙে রঙিন করছে ওরে
নিলাজমঞ্চে রাখছে তুলে ধরে,
আঙুল তুলে দেখাচ্ছে দিনরাত ;
লুকোয় কোথা ভেবে না পায়, আড়াল ভূমিসাৎ ।

সেঁজুতি

দাঁও না ছেড়ে ওকে
স্নিগ্ধ আলো শ্যামল ছায়া বিরল কথার লোকে,
বেড়াবিহীন বিরাট ধূলি'পর,
সেই যেখানে মহাশিশুর আদিম খেলাঘর।

ভোরবেলাকার পাখির ডাকে প্রথম খেয়া এসে
ঠেকল যখন সব প্রথমের চেনাশোনার দেশে ;
নামূল ঘাটে যখন তারে সাজ রাখে নি ঢেকে,
ছুটির আলো নগ্ন গায়ে লাগল আকাশ থেকে,
যেমন ক'রে লাগে তরুর পালে,
যেমন লাগে অশোক গাছের কচি পাতার ডালে।
নাম-ভোলা ফুল ফুটল ঘাসে ঘাসে
সেই প্রভাতের সহজ অবকাশে।
ছুটির যজ্ঞে পুষ্পহোমে জাগল বকুলশাখা,
ছুটির শূণ্ণে ফাগুনবেলা মেলল সোনার পাখা।

ছুটির কোণে গোপনে তার নাম
আচম্কা সেই পেয়েছিল মিষ্টি সুরের দাম ;
কানে কানে সে নাম-ডাকার ব্যথা উদাস করে
চৈত্রদিনের স্তব্ধ ছুই প্রহরে।
আজ সবুজ এই বনের পাতায় আলোর ঝিকিমিকি
সেই নিমেঘেব তারিখ দিল লিখি'।

সেঁজুতি

তাহারে ডাক দিয়েছিল পদ্মানদীর ধারা,
কাঁপন-লাগা বেগুর শিরে দেখেছে শুকতারা ;
কাজল-কালো মেঘের পুঞ্জ সজল সমীরণে
নীল ছায়াটি বিছিয়েছিল তটের বনে বনে ;
ও দেখেছে গ্রামের বাঁকা বাটে
কাঁখে কলস মুখর মেয়ে চলে স্নানের ঘাটে ;
সর্ষে-তিসির ক্ষেতে
ছই-রঙা সুর মিলেছিল অবাক আকাশেতে ;
তাই দেখেছে চেয়ে চেয়ে অন্তরবির রাগে
বলেছিল, এই তো ভালো লাগে ।
সেই যে ভালো-লাগাটি তার যাক সে রেখে পিছে
কীর্তি যা সে গঁথেছিল, হয় যদি হোক মিছে ;
না যদি রয় নাই রহিল নাম,
এই মাটিতে রইল তাহার বিস্ত্রিত শ্রণাম ॥

আলমোড়া

২২ বৈশাখ, ১৩৪৪

প্রাণের দান

অব্যক্তের অন্তঃপুরে উঠেছিলে জেগে,
তারপর হতে তরু, কী ছেলেখেলায়
নিজেরে ঝরায়ে চলো চলাহীন বেগে,
পাওয়া দেওয়া ছুই তব হেলায় ফেলায় ।
প্রাণের উৎসাহ নাহি পায় সীমা খুঁজি'
মর্মরিত মাধুর্যের সৌরভ সম্পদে ।
মৃত্যুর উৎসাহ সেও অফুরন্ত বৃষ্টি
জীবনের বিস্ত নাশ করে পদে পদে ।
আপনার সার্থকতা আপনার প্রতি
আনন্দিত ওদাসীতো ; পাও কোন্ সুখা
রিক্ততায় ; পরিতাপ-হীন আত্মকর্তা
মিটায় জীবনযজ্ঞে মরণের ক্ষুধা ।
এমনি মৃত্যুর সাথে হোক মোর চেনা,
প্রাণেরে সহজে তার করিব খেলনা ।

শান্তিনিকেতন

১ মার্চ, ১৯৩৮

সেঁজুতি

নিঃশেষ

শরৎ বেলার বিত্তবিহীন মেঘ

হারায়েছে তা'র ধারাবর্ষণ বেগ ;

ক্লান্তি আলসে যাত্রার পথে দিগন্ত আছে চুমি',

অঞ্জলি তব বৃথা তুলিয়াছ হে তরুণী বনভূমি ।

শাস্ত হইয়েছে দিকহারা তার ঝড়ের মন্ত লীলা,

বিদ্যুৎপ্রিয়া স্মৃতির গভীরে হোলো অন্তঃশীলা ।

সময় এসেছে, নির্জন গিরিশিরে

কালিমা ঘুচায়ে শুভ্র তুবারে মিশে যাবে ধীরে ধীরে ।

অন্ত সাগর পশ্চিমপারে সন্ধ্যা নামিবে যবে

সপ্ত ঋষির নীরব বীণার রাগিনীতে লীন হবে ।

তবু যদি চাও শেষ দান তার পেতে,

ঐ দেখো ভরা ক্ষেতে

পাকা ফসলের দোতুল্য অঞ্চলে

নিঃশেষে তার সোনার অর্ঘ্য রেখে গেছে ধরাতলে ।

সে কথা স্মরিয়ো, চলে যেতে দিয়ো তারে,

লজ্জা দিয়ো না নিঃস্ব দিনের নিষ্ঠুর রিক্ততারে ॥

শান্তিনিকেতন

৮/৪/৩৮

প্রতীক্ষা

অসীম আকাশে মহাউপস্থী
মহাকাল আছে জাগি' ।
আজিও যাহারে কেহ নাহি জানে,
দেয়নি যে দেখা আজো কোনোখানে,
সেই অভাবিত কল্পনাভীত
আবির্ভাবের লাগি'
মহাকাল আছে জাগি' ।

বাতাসে আকাশে যে নব রাগিণী
জগতে কোথাও কখনো জাগে নি
রহস্যলোকে তারি গান সাধা
চলে অনাহত রবে ।
ভেঙে যাবে বাঁধ স্বর্গপুরের,
প্লাবন বহিবে নূতন সুরের,
বধির যুগের প্রাচীন প্রাচীর
ভেসে চলে যাবে তবে ।

সেঁ জুতি

যার পরিচয় কারো মনে নাই,
যার নাম কভু কেহ শোনে নাই,
না জেনে নিখিল পড়ে আছে পথে
যার দরশন মাগি'—
তারি সত্যের অপরূপ রসে
চমকিবে মন অভূত পরশে,
মৃত পুরাতন জড় আবরণ
মুহূর্তে 'যাবে ভাগি',
যুগ যুগ ধরি' তাহার আশায়
মহাকাল আছে জাগি' ॥

শান্তিনিকেতন

৪।১০।৩৬

সেঁ জুতি

পরিচয়

একদিন তরীখানা থেমেছিল এই ঘাটে লেগে,
বসন্তের নূতন হাওয়ার বেগে ।
তোমরা মুখায়েছিলে মোরে ডাকি’
পরিচয় কোনো আছে না কি,
যাবে কোন্‌খানে ।
আমি শুধু বলেছি, কে জানে ।

নদীতে লাগিল দোলা, বাঁধনে পড়িল টান
একা বসে গাহিলাম যৌবনের বেদনার গান ।
সেই গান শুনি’
কুসুমিত তরুতলে তরুণ তরুণী
তুলিল অশোক,
মোর হাতে দিয়ে তা’রা কহিল, এ আমাদেরি লোক ।

সেঁজুতি

আর কিছু নয়,
সে মোর প্রথম পরিচয় ।

তারপরে জোয়ারের বেলা
সাক্স হোলো, সাক্স হোলো তরঙ্গের খেলা,
কোকিলের ক্লান্ত গানে
বিস্মৃত দিনের কথা অকস্মাৎ যেন মনে আনে ;
কনকচাঁপার দল পড়ে ঝরে,
ভেসে যায় দূরে,—
ফাস্কনের উৎসব রাতির
নিমন্ত্ৰণ লিখন পাঁতির
ছিন্ন অংশ তা'রা
অর্থহারা ।

ভাঁটার গভীর টানে
তরীখানা ভেসে যায় সমুদ্রের পানে ।
নূতন কালের নব যাত্রী ছেলেমেয়ে
সুধাইছে দূর হতে চেয়ে
সন্ধ্যার তারার দিকে
বহিয়া চলেছে তরণী কে ।

সেতারেতে বাঁধিলাম তার,
গাহিলাম আরবার—

সেঁজুতি

—মোর নাম এই ব'লে খ্যাত হোক,—
আমি তোমাদেরি লোক ।—
আর কিছু নয়—
এই হোক শেষ পরিচয় ॥

শাস্তিনিকেতন

১৩ মাঘ, ১৩৪৩

সেঁজুতি

পালের নৌকা

তীরের পানে চেয়ে থাকি পালের নৌকা ছাড়ি',
গাছের পরে গাছ ছুটে যায়, বাড়ির পরে বাড়ি।

দক্ষিণে ও বামে

গ্রামের পরে গ্রামে

ঘাটের পরে ঘাটগুলো সব পিছিয়ে চলে যায়

ভোজবাজিরি প্রায়।

নাইছে যারা তারা যেন সবাই মরীচিকা
যেমনি চোখে ছবি আঁকে মোছে ছবির লিখা !
আমি যেন চেপে আছি মহাকালের তরী,
দেখছি চেয়ে যে খেলা হয় যুগযুগান্ত ধরি'।
পরিচয়ের যেমন শুরু তেমনি তাহার শেষ,
সামনে দেখা দেয়, পিছনে অমনি নিরুদ্দেশ।
ভেবেছিলুম ভুলব না যা, তাও যাচ্ছি ভুলে,
পিছু-দেখার ঘুচিয়ে বেদন চলছি নতুন কূলে।

সেঁজুতি

পেতে পেতেই ছাড়া

দিনরাত্রির মনটাকে দেয় নাড়া ।

এই নাড়াতেই লাগছে খুশি, লাগছে ব্যথা কড়ু,

বেঁচে-থাকার চলতি খেলা লাগছে ভালোই তবু ।

স্বারেক ফেলা, বারেক তোলা, ফেলতে ফেলতে যাওয়া—

এ'কেই বলে জীবন তরীর চলন্ত দাঁড় বাওয়া ।

তাহার পরে রাত্রি আসে, দাঁড়টানা যায় থামি,

কেউ কাছেও দেখতে না পায় আঁধার-তীর্থগামী ।

ভাঁটার শ্রোতে ভাসে তরী, অকূলে হয় হারা

যে সমুদ্রে অস্তে নামে কালপুরুষের তারা ॥

সেঁজুতি

চলাচল

ওরা তো সব পথের মানুষ, তুমি পথের ধারের,
ওরা কাজে চলছে ছুটে, তুমি কাজের পারের।
বয়স তোমায় অনেক দিল, অনেক নিল কেড়ে.
রইল যত তাহার চেয়ে অধিক গেল ছেড়ে।
চিহ্ন পড়ে, তারে চাকে নতুন চিহ্ন এসে,
কোনো চিহ্ন স্পষ্ট হয়ে রয় না অবশেষে।
যেথায় ছিল চেনা লোকের নীড়
অনায়াসে জমল সেথায় অচেনাদের ভিড়।
তুমি শাস্ত হাসি হাসো যখন ওরা ভাবে
ওদের বেলায় অক্ষত দিন এমনি করেই যাবে।

মায়া

১

করেছিহু যত সুরের সাধন
নতুন গানে,
খসে পড়ে তার স্মৃতির বাঁধন
আলগা টানে।
পুরানো অতীতে শেষে মিলে যায়।
বেড়ায় ঘুরে,
প্রেতের মতন জাগায় রাত্রি
মায়ার সুরে।

২

ধরা নাহি দেয় কণ্ঠ এড়ায়
যে সুরখানি
স্বপ্ন গহনে লুকিয়ে বেড়ায়
তাহার বাণী।

সেঁজুতি

বুকের কাঁপনে নীরবে দোলে সে
ভিতর পানে,
মায়ার রাগিণী ধ্বনিয়া তোলে সে
সকল খানে ।

৩

দিবস ফুরায় কোথা চলে যায়
মর্ত্য কায়া,
বাঁধা পড়ে থাকে ছবির রেখায়
ছায়ার ছায়া ।

নিত্য ভাবিয়া করি যার সেবা
দেখিতে দেখিতে কোথা যায় কেবা,
স্বপ্ন আসিয়া রচি' দেয় তার
রূপের মায়া ॥

মৈত্ৰী

গগনেন্দ্ৰনাথ ঠাকুর

গগনেন্দ্ৰনাথ,

রেখার রঙের তীর হতে ভীরে
ফিরেছিল তব শ্রম,
রূপের গভীরে হয়েছিল নিমগন ।
গেল চলি' তব জীবনের স্রী
রেখার সীমার পার
অরূপ ছবির রহস্য মাঝে
অমল শুভ্রতার ॥

শান্তিনিকেতন

১৯৮৭

Nawaz's Library,
Calcutta 27

সেঁজুতি

ছুটি

আমার ছুটি আসছে কাছে সকল ছুটির শেষে,
ছবি একটি জাগছে মনে—ছুটির মহাদেশ ।
আকাশ আছে স্তব্ধ সেথায়, একটি সুরের ধারা
অসীম নীরবতার কানে বাজাচ্ছে একতারা ॥